



Sumáriu Kazu
Tribunál Distritál Dili
Fevereiru 2020

Afirmasaun: Sumáriu Kazu tuirmai ne'e deskreve faktu sira no prosesu iha tribunál tuir JSMP nia monitorizasaun independente, no deklarasaun ne'ebé parte sira fó iha tribunál nia laran. Informasaun ne'e la reprezenta JSMP nia hanoin hanesan instituisaun ida.

JSMP kondena maka'as forma violénsia hotu-hotu, liuliu hasoru fetu no ema vulneravel. JSMP afirma la iha justifikasaun ba kualkér violénsia hasoru fetu.

A. Sumáriu prosesu julgamentu kazu iha Tribunál Distritál Dili

1. Totál kazu ne'ebé JSMP monitoriza : 35

Artigu	Tipu kazu	Númeru
Artigu 177 alinea 2, 182 (a) KP	Abuzu seksuál ba menór ho agravasaun	1
Artigu 145 Kódigu Penál (KP) no konjuga ho artigu 2, 3, 35(b) no 36 LKVD	Ofensa ba integridade fízika simples ho natureza violénsia doméstika (artigu 2 kona-ba konseitu violénsia doméstika, artigu 3 kona-ba relasaun família, artigu 35 kona-ba tipu krime violénsia doméstika sira no artigu 36 kona-ba krime sira violénsia doméstika nian hanesan krime públiku)	15
Artigu 23, 24, no artigu 172 KP	Tentativa, tentativa nia punibilidade no violasaun seksuál	1
Artigu 174 KP	Explorasaun seksuál ba ema seluk	1
Artigu 183 KP	Devasa	1

Artigu 155 KP konjuga ho artigu 2,3 (c) no 35 (a) LKVD.	Maus tratus ba menór	1
Artigu 143 KP	Expozisaun ka abandonu	1
Artigu 296 KP	Pekulatu ho uzu	1
Artigu 292 nú. (1) KP no 294 nú. (1) KP	Korrupsaun pasiva ba aktu ilísitu no korrupsaun ativa	1
Artigu 145 KP no konjuga ho artigu 2, 3, 35(b) no 36 LKVD, artigu 2 Nù 1 alinea b no artigu 20 nú. 1 Lei Nú. 5/2017	Ofensa ba integridade fízika simples ho natureza violénsia doméstika no krime arma brankas	1
Artigu 146 KP	Ofensa ba integridade fízika grave	1
Artigu 1871 no 1757 Kódigu Prosesu Sivíl (KPS)	Ezersisiu podér paternál	1
Artigu 139 KP, 23,138 KP, artigu 2 Nù 1 alinea b no artigu 20 nú. 1 Lei Nú. 5/2017	Omisídiu agravadu, tentativa omisídiu simples no krime arma brankas	1
Artigu 257, 304 (1) KP	Abuzu konfiansa agravadu no falsifikasaun agravada	1
Artigu 139, 23,138 KP	Omisídiu agravadu, tentativa omisídiu simples	1
Artigu 225 KP	La halotuir obrigasaun alimentár	1
Artigu 207 KP	Kondusaun sein karta	1
Artigu 2 Nù 1 alinea b no artigu 20 nú. 1	Arma brankas	1

Lei Nú. 5/2017		
Total		34

2. Totál desizaun ne'ebé JSMP monitoriza : 22

Tipu desizaun	Númeru
Suspensaun ba prizaun nia ezekusaun (Artigu 68 KP)	10
Pena admoestasaun (Artigu 82)	5
Suspensaun ba prizaun nia ezekusaun (Artigu 68 KP) no absolve	1
Omologa	1
Prizaun	1
Multa	2
Absolve	2
Totál	22

3. Total kazu sira ne'ebé adia tuir JSMP nia monitorizasaun: 1

Razaun adia	Númeru
Prokuradór titulár moras no laiha substituisaun	1
Total	1

4. Total Kazu ne'ebé sei kontinua prosesu tuir JSMP nia monitorizasaun : 11

B. Deskripsaun sumáriu ba desizaun kazu sira ne'ebé JSMP monitoriza

1. Krime expozisaun ka abandonu

Nú. Prosesu : 0227/18/NNSF
 Kompozisaun Tribunál : Singulár
 Juis : Dr. João Ribeiro, Dr. Maria Solana no Dra. Maria Modesta
 Prokuradór : Dr. Jacinto Babo Soares
 Defeza : Dr. Manuel Sarmiento
 Desizaun : Pena prizaun tinan tolu suspende ba tinan tolu fulan neen.

Iha 03 Feveireiru 2020, Tribunál Distritál Dili prezide julgamentu leitura sentensa ba krime expozisaun ka abandonu ne'ebé envolve arguida hasoru nia oan, iha Distritu Dili

Akuzasaun Prokuradór

Prokuradór akuza katak iha 2018, iha oras tuku 08:00 dadeer, arguida ho kondisaun isin rua todan ba iha uma mamuk ne'ebé sei iha faze konstrusaun nia laran ho distánsia metru ualu (8) husi arguida nia uma hodi hahoris bebe mane ida. Maibé depoisde hahoris tiha, arguida husik hela bebe ne'e iha sementi leten no arguida fila tiha ba iha nia uma.

Iha tuku 13:00 meiodia, testemuña JM nu'udar badaen ba konstrusaun uma refere, mak hetan fali bebe iha sementi leten ho kondisaun moris hela maibé nehek hobur ona bebe nia isin-loloon tanba sei ho ran. Testemuña JM hakbesik-an ba bebe refere no ko'us tiha no lori sai mai li'ur hodi bolu viziñu sira inklui telefone ba iha polísia. La liu oras balun, polísia no viziñu sira deskobre katak bebe nia inan mak arguida. Durante arguida isin rua arguida subar husi família.

Prokuradór akuza arguida kontra artigu 142 KP kona-ba krime infantisídiu ho moldura penál tinan 1 to'o 6 no limite mínimo no máximo sei sa'e tan datoluk ida tanba vítima nu'udar arguida nia dexendente.

Produsaun ba prova sira

Iha julgamentu, arguida rejeita ba faktu balun iha akuzasaun katak nia laiha intensaun atu oho nia bebe tanba momentu ne'ebá nia atu ba kioske maibé tuir dalan nia sente atu soe bee ki'ik nune'e nia tama ba uma aat ida ne'ebé besik ho sira nia uma hodi mii. Arguida hatutan katak bainhira tuur atu mii derrepente bebe monu tuun ba semente leten nune'e arguida deside fila ba uma ho intensaun atu ba foti neras bebe nian hodi mai ko'us nia bebe ne'e maibé bainhira to'o uma arguida sente oin halai maka'as nune'e nia monu kedan iha fatin. Bainhira arguida oin moos, arguidu haree ema barak inklui polísia haklalak iha nia uma oin no kous ho nia bebe ne'e enkuantu temi arguida nia naran.

Arguida rekoñese katak durante isin-rua nia la fó hatene ba nia família tanba ta'uk ho reazen família nian tanba arguida sei estudante hela. Aleinde ne'e, arguida mós deklarara katak mane ne'ebé fó oan ba arguida lakohi responsabiliza tanba iha feen. Mezmu nune'e, depoisde akontesimentu ne'e to'o agora dadaun arguida mak kuidadu inklui fó susu no fó han bebe.

Alegasaun final

Prokuradór konsidera arguida provadu komete krime tuir faktu sira iha akuzasaun prokuradór nian, tanba mezmu arguida deklarara nia laiha intensaun atu oho nia bebe, maibé husi nia maneira subar nia kondisaun grávida husi família inklui nia deklarasaun kona-ba nia tama uma aat atu ba mii hatudu momoos katak arguida bosok no iha duni intensaun atu hamate nia bebe.

Prokuradór argumenta liutan katak haree ba distánsia entre uma ne'ebé arguida soe bebe ba no arguida nia uma so dook deit metro ualu (8) no ida ne'e sai dúvida tanba sa arguida la ba mii de'it iha arguida nia uma duke ba iha ema nia uma fatin. Parte seluk mós razaun arguida dehan

atu ba foti neras maibé realidade nia la fila no sorte testemuña hetan sela'e bebe bele mate, tanba nehek komesa hobur ona bebe nia isin bainhira testemuña hetan. Nune'e, husu ba tribunál atu kondena arguida ho pena prizaun efetivu.

Enkuantu parte defeza husu ba tribunál atu tetu faktu sira hotu ne'ebé prodús iha julgamentu inklui tetu ba presauun psikólojia ne'ebé arguida hasoru tanba isin rua ho mane ne'ebé lakohi responsabiliza. Defeza argumenta mós katak feto sira ho situasaun ne'e dala barak preokupa maka'as ho sosiedade nia kondenasauun no hanesan arguida deklarara katak nia mós ta'uk ba nia família. Situasaun sira ne'e halo arguida ho feto sira ne'ebé ho kondisaun hanesan bele to'o iha opsaun hili atu abandona sira nia oan. Nune'e husu ba tribunál atu fó pena ne'ebé kmaan ba arguida hodi tetu mós ba arguida nia arependimentu inklui agora dadaun arguida mak kuidadu ninia bebe.

Desizaun

Antes tama desizaun, tribunál deside halo alterasaun kualifikasaun jurídika husi krime infantisídiu ba fali krime expozisaun ka abandonu (artigu 143 KP) ho konsiderasaun tribunál katak arguida iha intensaun abandona bebe hodi husik hela bebe ne'ebé ho kondisaun foin moris iha semente leten, afinál arguida nu'udar inan ne'ebé iha obrigasaun atu proteze bebe ne'e. Tribunál mós la simu arguida nia razaun katak arguida husik hela ho intensaun atu ba foti hena mai ko'us bebe, tanba realidade arguida la fila ba foti nia bebe to'o polísia ho viziñu sira mak ba fali arguida nia uma.

Mezmu nune'e tribunál tetu mós ba sirkunstánsia atenuante sira katak arguida kolabora ho tribunál, hatudu ninia arrendimentu liuhusi responsabiliza ba nia bebe inklui fó susu bebe no kuidadu bebe to'o agora. Bazeia ba prova sira no konsiderasaun sira hotu, tribunál konklui prosesu ne'e no kondena arguida ho pena prizaun tinan tolu suspende ba tinan tolu fulan neen.

2. Krime ofensa ba integridade fízika simples ho natureza violénsia doméstika

Nú. Prosesu	: 0054/18.ALSIC
Kompozisaun Tribunál	: Singulár
Juis	: Dr. Afonso Carmona
Prokuradór	: Dr. Nelson de Carvalho
Defeza	: Dr. Germano Guterres Ramos
Desizaun	: Pena prizaun fulan 9 suspende ba tinan 1 fulan 6

Iha 04 Feveireiru 2020, Tribunál Distritál Dili liuhusi julgamentu móvel iha Distritu Aileu prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu AS hasoru nia feen, iha Distritu Aileu.

Akuzasaun Prokuradór

Prokuradór akuza katak iha 03 Outubru 2018, maizumenus iha oras tuku 01:00 madrugada, arguidu ho lezada sira nia oan ne'ebé toba hela derrepente hakfodak no tanis, nune'e arguidu hadeer ba kous tiha labarik. Maibé depoisde kous tiha sira nia oan, arguidu hakat besik ba lezada ne'ebé toba hela hodi basa dala rua iha lezada nia ulun parte karuuk no loos no tuku dala ida iha lezada nia ibun.

Tuir mai, iha 04 Outubru 2018, iha tuku 10:30 dadeer, lezada fase hela roupa no arguidu mak haree hela labarik. Derrepente lezada rona sira nia oan tanis, nune'e lezada la'o ba atu ko'us no fo han sira nia oan ne'e maibé arguidu lakohi husik sira nia oan ba lezada hodi hateten dehan "*ó atu ba ó nia inan-aman ba de'it ona, husik labarik hau fó hemu susuben de'it ona,*". Koa'lia tiha nune'e arguidu kous labarik tama tiha ba uma-laran no bainhira lezada tama tuir ba uma-laran, arguidu basa dala rua iha lezada nia ulun no tuku dala rua iha lezada nia kanuruk. Arguidu mós buti lezada nia kakorok hodi riba lezada ba rai, hafoin arguidu tebe dala ida iha lezada nia knosen sorin parte loos.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu konfesa faktu hotu iha akuzasaun no deklarara katak arrepende ona ninia hahalok. Arguidu mós deklarara katak sira di'ak malu ona no arguidu mak kontinua tau-matan ba lezada ho nia oan na'in tolu. Depoisde akontesimentu ne'e arguidu mós la baku tan ona lezada no husu ona deskulpa ba lezada.

Tribunál presinde la rona ona lezada ninia deklarasaun tanba arguidu konfesa faktu hotu iha akuzasaun.

Alegasaun finál

Prokuradór konsidera arguidu ninia hahalok ne'e prenxe duni elementu sira hosi krime ofensa ba integridade fízika simples bazeia ba arguidu nia konfisaun. Maibé tanba arguidu arrepende, konfesa inklui foin primeiravés mai hatan iha tribunál no di'ak malu ona ho lezada, nune'e prokuradór husu ba tribunál atu kondena arguidu ho pena admoestasaun.

Entretantu defeza iha nia alegasaun konkorda ho prokuradór nia alegasaun hodi husu pena admoestasaun, tanba arguidu konfesa ninia hahalok, di'ak malu ona ho lezada no kontinua tau-matan ba sira nia oan na'in tolu.

Desizaun

Depoisde avalia faktu hotu, tribunál prova katak arguidu basa dala rua iha lezada nia ulun parte karuuk no loos no tuku dala ida iha lezada nia ibun. Tribunál mós prova katak iha loron tuir mai arguidu basa dala rua iha lezada nia ulun, tuku dala rua iha lezada nia kanuruk, buti lezada nia kakorok hodi riba lezada ba rai no tebe dala ida iha lezada nia knosen sorin parte loos.

Bazeia ba prova sira ne'e no tribunál tetu mós ba sirkuntánsia atenuante sira ne'ebé haleu iha krime ne'e katak arguidu arrepende ninia hahalok, di'ak malu ona lezada no foin mak premeiravés mai hatan iha tribunál, tribunál konklui no kondena arguidu ba kada akontesimentu ho pena prizaun fulan neen no husi pena hirak ne'e, tribunál akomula hamutuk no kondena arguidu no pena únika fulan sia suspende ba tinan ida fulan neen prizaun.

3. Krime ofensa ba integridade fízika simples ho natureza violénsia doméstika

Nú. Prosesu	: 0043/18.ALSIC
Kompozisaun Tribunál	: Singulár
Juis	: Dr. Antonio José Fonseca Monteiro de Jesus
Prokuradór	: Dr. Nelson de Carvallho
Defeza	: Dr. Germano Guterres Ramos
Desizaun	: Pena prizaun fulan 6 suspende ba tinan 1

Iha 04 Feveireiru 2020, Tribunál Distritál Dili liuhusi julgamentu móvel iha Distritu Aileu prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu JdC hasoru nia feen, iha Distritu Aileu.

Akuzasaun Prokuradór

Prokuradór akuza katak iha 06 Setembru 2018, maizumenus iha tuku 07:00 dadeer, arguidu ho lezada diskute malu, ho nune'e arguidu basa dala rua iha lezada nia hasan sorin loos ho karuuk no kontinua dudu lezada ba airin rezulta lezada monu ba rai. Antes diskute malu lezada haree arguidu nia telefone iha foto fetu seluk nian, nune'e lezada hamoos tiha foto refere. Maibé bainhira arguidu haree fali nia telefone foto fetu ne'e ninian laiha ona, arguidu komete agresaun refere hasoru lezada.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu rekoñese faktu hotu iha akuzasaun no deklara katak arrepende ona ninia hahalok. Arguidu konsiente katak basa dala rua iha lezada nia hasan parte loos no karuk no dudu lezada ba airin halo lezada monu ba rai hahalok la di'ak. Arguida mós deklara

katak sira di'ak malu ona no arguidu mak kontinua sustenta lezada ho nia oan na'in haat. Depoisde akontesimentu ne'e arguidu la baku tan ona lezada.

Entretantu lezada konfirma faktu hotu iha akuzasaun no deklara katak arguidu nia hahalok halo lezada sente moras iha hasan parte loos no parte karuk no moras mós iha ain-tuur tanba monu. Mezmu nune'e lezada fó perdua arguidu tanba depoisde akontesimentu liutiha semana ida arguidu husu ona deskulpa ba lezada.

Alegasaun final

Prokuradór konsidera arguidu nia hahalok ne'e prenxe duni elementu sira hosi krime ofensa ba integridade fízika simples bazeia ba arguidu nia konfisaun no lezada nia konfirmasaun ba faktu sira iha akuzasaun. Prokuradór rekoñese katak arguidu arrepende no arguidu mak sustenta lezada ho nia oan na'in haat. Mezmu nune'e, atu halo prevensaun ba futuro arguidu la bele halo tan aktu sira ba lezada ka ema seluk, husu ba tribunál atu kondena arguidu ho pena admoestasaun.

Nune'e mós defeza konkorda ho prokuradór nia alegasaun atu kondena arguidu ho pena admoestasaun tanba arguidu konfesa faktu sira hotu iha akuzasaun, arrepende ona ninia hahalok no dame malu ona ho lezada.

Desizaun

Depoisde avalia faktu hotu, tribunál prova katak arguidu ho lezada hanesan feen ho laen, arguidu halo duni agresaun hasoru lezada hanesan basa dala rua iha lezada nia hasan parte loos no parte karuk no dudu lezada ba airin halo lezada monu ba rai. Tribunál haree mós ba sirkunstánsia atenuante sira hanesan arguidu arrepende, diak malu ona ho lezada no arguidu mak sustenta lezada ho sira nia oan, nune'e tribunál kondena arguidu ho pena prizaun fulan neen suspende ba tinan ida.

4. Krime ofensa ba integridade fízika simples ho natureza violénsia doméstika

Nú. Prosesu	: 0003/19. ALLLR
Kompozisaun Tribunál	: Singulár
Juis	: Dr. Afonso Carmona
Prokuradór	: Dr. Nelson de Carvalho
Defeza	: Dr. Germano Guterres Ramos
Desizaun	: Pena admoestasaun

Iha 04 Feveireiru 2020, Tribunál Distritál Dili liuhusi julgamentu móvel iha Distritu Aileu prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu AdD hasoru nia feen, iha Distritu Aileu.

Akuzasaun Prokuradór

Prokuradór akuza katak iha 16 Juñu 2019, maizumenus iha tuku 20:00 kalan, lezada toba hela iha sira nia oan nia kuartu laran, tanba lezada moras isin manas. Bainhira haree lezada toba iha sira nia oan nia kuartu, arguidu tolok no haruka lezada sai hosi sira nia uma, maibé lezada kontinua toba nonook iha fatin. Nune'e, arguidu tama ba kuartu-laran tuku dala ida ho maka'as iha lezada nia kotuk-laran. Arguidu mós foti tudik nune'e halo arguidu no lezada hadau-malu tudik to'o lezada konsege hadau tudik husi arguidu no halai liu ba hato'o keixa iha polísia.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu konfesa integralmente ba faktu hotu iha akuzasaun no deklarata katak arrepende ona ninia hahalok. Arguidu konsiente katak tuku dala ida ho maka'as iha lezada nia kotuk laran ne'e hahalok la diak, no di'ak malu ona ho lezada no deklarata katak arguidu mak kontinua tau-matan ba lezada ho nia oan na'in tolu. Depoide akontesimentu ne'e arguidu la baku tan ona lezada.

Entretantu lezada kontinua konfirma faktu hotu iha akuzasaun no deklarata katak arguidu ninia hahalok ne'e halo lezada sente moras maka'as iha kotuk laran. Lezada mós konfirma kona-ba arguidu husu ona deskulpa depoide akontesimentu, di'ak malu ona ho lezada no arguidu la baku tan ona lezada inklui kontinua sustenta lezada ho sira nia oan.

Alegasaun final

Prokuradór konsidera arguidu komete duni faktu sira iha akuzasaun bazeia ba arguidu konfisaun no lezada nia konfirmasaun ba faktu sira. Maibé mezmú arguidu konfesa no kontinua sustenta sira nia família, importante tebes atu halo prevensaun ba futuru atu arguidu la bele halo tan krime hasoru nia feen no ema seluk. Tanba ne'e, husu ba tribunál atu kondena arguidu ho pena admoestasaun.

Defeza konkorda ho prokuradór nia alegasaun no husu tribunál aplika pena admoestasaun ba arguidu tanba arguidu konfesa faktu sira hotu iha akuzasaun, arrepende ninia hahalok no dame malu ona ho lezada.

Desizaun

Depoide avalia faktu hotu, tribunál prova katak, arguidu tuku dala ida ho maka'as iha lezada nia kotuk laran. Bazeia ba prova ne'e no tetu mós ba sirkunstánsia sira ne'ebé haleu ona iha krime ne'e, tribunál kondena arguidu ho pena admoestasaun no kondena arguidu selu kustu judisiál US\$20.00.

5. Krime ofensa ba integridade fízika simples ho natureza violénsia doméstika

Nú. Prosesu : 0034/19.ALSIC
Kompozisaun Tribunál : Singulár
Juis : Dr. Antonio José Fonseca Monteiro de Jesus
Prokuradór : Dr. Nelson de Carvalho
Defeza : Dr. Germano Guterres Ramos
Desizaun : Pena prizaun tinan 1 fulan 3 suspende ba tinan 1 fulan 3

Iha 04 Feveireiru 2020, Tribunál Distritál Dili liuhusi julgamentu móvel iha Distritu Aileu prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu DS hasoru nia feen, iha Distritu Aileu.

Akuzasaun Prokuradór

Prokuradór akuza katak iha 01 Juñu 2019, maizumenus iha tuku 20:00 kalan, arguidu no lezada fila husi merkadu no bainhira to'oma, sira haree sira nia oan feto tein hela iha dapur laran. Arguidu ka'er lezada nia fu'uk no baku ba didin loloon, hafoin tebe dala tolu iha lezada nia kanotak no tebe dala ida iha kabun. Arguidu foti ai-pedasuk ida no baku dala haat iha lezada nia ain tu'ur no liman kabun sorin loos. Arguidu mós tuku dala rua iha lezada nia matan-fukun halo lezada sente moras no fitar iha matan. Arguidu hapara ninia agresaun ne'e bainhira lezada nia alin mane satan-netik lezada. Aktu ne'e rezulta lezada sofre moras no bubu iha isin loloon.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'oma tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu konfesa faktu hotu iha akuzasaun no deklarata katak arrepende ona ninia hahalok. Arguidu mós deklarata katak depoisde akontesimentu ne'e arguidu la baku tan ona lezada, di'ak malu ona ho lezada, arguidu kontinua tau-matan ba lezada ho nia oan na'in hitu no promete katak sei la repete tan hahalok hanesan iha futuru.

Entretantu lezada mós kontinua konfirma faktu sira iha akuzasaun no deklarata katak arguidu nia hahalok halo lezada sente moras iha kanotak, ulun to'oma matan fukun maibé lezada la ba halo tratamentu iha sentru saúde. Aleinde ne'e lezada deklarata katak sira di'a malu ona to'oma agora.

Alegasaun final

Prokuradór konsidera arguidu ninia hahalok ne'e prenxe duni elementu sira hosi krime ofensa ba integridade fízika simples tanba arguidu konfesa no hetan konfirmasaun mós husi lezada. Bazeia ba konsiderasaun ne'e, husu ba tribunál atu kondena arguidu ho pena admoestasaun.

Nune'e mós defeza konkorda ho pedidu prokuradór nian no husu tribunál kondena arguidu ho pena admoestasaun tanba arguidu konfesa faktu sira hotu iha akuzasaun, arrepende ona ninia hahalok no dame malu ona ho lezada inklui arguidu promete ona ba tribunál katak sei la repete tan hahalok hanesan iha futuru.

Desizaun

Depoide avalia faktu hotu, tribunál prova katak arguidu ka'er lezada nia fu'uk no baku ba didin-loloon. Hafoin arguidu tebe dala tolu iha lezada nia kanotak no tebe dala ida iha kabun. Arguidu lori ai-pedasuk ida no baku dala haat iha lezada nia ain-tu'ur no liman kabun sorin loos. Tribunál mós prova katak arguidu tuku dala rua kona iha lezada nia matan fukun to'o fitar iha matan. Bazeia ba prova sira ne'e no tetu mós sirkunstánsia atenuante sira hanesan arguidu arrepende ona ninia hahalok, di'ak malu ona ho lezada no fo'in primeiravés mai hatan iha tribunál, tribunál konklui no kondena arguidu ho pena prizaun tinan ida fulan tolu suspende ba tinan ida fulan tolu.

6. Krime ofensa ba integridade fízika simples ho natureza violénsia doméstika

Nú. Prosesu : 0045/18.ALSIC
Kompozisaun Tribunál : Singulár
Juis : Dr. Antonio José Fonseca Monteiro de Jesus
Prokuradór : Dr. Nelson de Carvalho
Defeza : Dr. Germano Guterres Ramos
Desizaun : Pena prizaun fulan 2 suspende ba tinan 1

Iha 04 Fevereiru 2020, Tribunál Distritál Dili liuhusi julgamentu móvel iha Distritu Aileu prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu JdS hasoru nia feen, iha Distritu Aileu.

Akuzasaun Prokuradór

Prokuradór akuza katak iha 16 Outubru 2018, maizumenus tuku 10:00 dadeer, lezada ho sira nia oan ba toos hodi hamoos du'ut no bainhira fila husi toos, lezada ho nia oan lori ho kulu. Arguidu husu ba sira nia oan "se mak ku'u kulu ne'e?" no sira nia oan hatan katak maun ho naran N mak kuu kulu ne'e. Rona ida ne'e arguidu komesa tolok lezada hafoin tuku dala ida ba iha lezada nia reen-toos no mós tebe dala ida ba iha lezada nia reen-toos.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu konfesa faktu hotu iha akuzasaun no deklara katak arrepende ona ninia hahalok. Arguida mós deklara katak sira di'ak malu ona no arguidu mak kontinua tau-matan ba lezada ho nia oan na'in ualu no la baku tan ona lezada to'o agora.

Enkuantu, lezada mós konfirma faktu sira iha akuzasaun no deklarata katak arguidu ninia hahalok ne'e halo lezada sofre bubu no moras iha reen-toos. Maibé sira di'ak malu ona no arguidu kontinua tau-matan ba lezada ho nia oan na'in ualu.

Tribunál presinde la rona ona testemuña sira nia depoimentu tanba arguidu konfesa no lezada konfirma ho faktu sira.

Alegasaun final

Prokuradór konsidera arguidu komete duni krime hasoru lezada tuir faktu sira iha akuzasaun. Maibé atu halo prevensaun ba futuro, husu ba tribunál atu kondena arguidu ho pena admoestasaun maibé karik tribunál iha hanoin seluk, husu atu kondena arguidu tuir konviksaun tribunál ninian.

Entretantu defeza konsidera arguidu konfesa faktu sira hotu iha akuzasaun, arrepende ona ninia hahalok no dame malu ona ho lezada. Tanba ne'e, konkorda ho pedidu hosi prokuradór nian no husu ba tribunál atu kondena arguidu ho pena admoestasaun.

Desizaun

Depoizde avalia faktu hotu, tribunál prova katak arguidu tuku no tebe dala ida iha lezada nia reen-toos. Bazeia ba sirkunstánsia atenuante no agravante sira, tribunál konklui prosesu ne'e no kondena arguidu ho pena prizaun fulan rua suspende ba tinan ida.

7. Krime ofensa ba integridade física simples ho natureza violéncia doméstika no krime arma brankas

Nú. Prosesu	: 0227/19. DICMR
Kompozisaun Tribunál	: Koletivu
Juis	: Dra. Maria Solana Soares Fernandes, Dra. Maria Modesta de Almeida Viera no Dr. João Ribeiro
Prokuradór	: Dra. Bemvinda do Rosario
Defeza	: Dr. Germano Guterres Ramos
Desizaun	: Pena prizaun tinan 3 suspende ba tinan 3

Iha 05 Feveireiru 2020, Tribunál Distritál Dili prezide leitura akordaun ba krime ofensa ba integridade física simples ho natureza violéncia doméstika no krime arma brankas ne'ebé envolve arguidu FD hasoru nia banin mane (FM), iha Distritu Dili.

Akuzasaun Prokuradór

Prokurador akuza katak iha 26 Maiu 2019, oras tuku 16:00 meiodia arguidu fó hatene ba nia banin fetu katak orsida kalan arguidu lori nia feen ho oan ba toba iha Perumnas tanba arguidu nia

tiun nia oan moras, maibé arguidu nia banin fetu hatan katak arguidu deit mak ba no arguidu nia feen ho oan hela. Maibé iha oras tuku 18:00 Otl, bainhira arguidu atu arangka ba perumnas, arguidu nia feen mós hakarak ba toba hotu iha perumnas. Ho nune'e lezadu haruka labarik ida ba bolu arguidu nia feen ho oan iha uma oin maibé arguidu nia feen lakohi no hakarak ba toba duni iha perumnas, tanba ne'e lezadu hakilar ba arguidu katak “ *o brani los ona ka*”.

Nune'e lezadu tuku arguidu nia feen nia ulun no kabun dala ida hodi arguidu nia feen monu tun ba rai. Tanba ne'e arguidu la satisfas ho lezadu nia hahalok ne'e, arguidu foti tudik no sona lezadu nia kotuk laran rezulta kanek no ran sai. Aktu ne'e, halo lezadu hetan kanek iha nia kotuk laran no ba halo tratamentu médiku iha Hospital Nacional Guido Valadares.

Prokuradór akuza arguidu kontra artigu 145 KP kona-ba krime ofensa ba integridade fízika simples no artigu 2 Nú. 1 alinea b no artigu 20 Nú. 1 husi Lei Nú. 5/2017 kona-ba arma brankas.

Produsaun ba prova sira

Iha prosesu julgamentu, arguidu konfesa faktu hotu no deklarara ba tribunál katak bainhira arguidu atu lori nia feen no oan ba perumnas mak lezadu la hatan no tuku dala ida iha arguidu nia feen nia ulun no kabun. Hodi ida ne'e arguidu tama ba kuartu laran no foti tudik ida no sona iha lezadu nia kotuk laran. Arguidu deklarara katak foin primeiravés mai tribunál, arrepende ninia hahalok no durante ne'e arguidu hamutuk ho nia banin fetu faan OB hamutuk hodi sustenta família.

Aleinde ne'e, lezadu mós konfirma faktu sira iha akuzasaun no deklarara katak lezadu bandu arguidu nia feen ho oan tuir arguidu tanba durante ne'e sira na'in rua moris hamutuk ne'e, família rua seidauk koñese malu. Lezadu hatutan katak lezadu nu'udar arguidu nia feen nia aman padrastu ne'ebé mak tau-matan ba arguidu nia feen desde ki'ik.

Alegasaun finál

Prokuradór haktuir katak arguidu konfesa no provadu komete krime hasoru lezadu hanesan nia banin bazeia ba konfisaun arguidu nian no lezadu nia konfirmasaun ba faktu sira iha akuzasaun. Tanba ne'e husu ba tribunál atu aplika pena prizaun tinan tolu maibé suspende ba tinan lima hodi hadia arguidu nia hahalok iha futuro.

Aleinde ne'e defeza haktuir katak arguidu konfesa ba faktu hotu, rekoñese ninia hahalok no durante ne'e arguidu hamutuk ho nia banin fetu fa'an OB hodi sustenta família. Haree mós ba iha lezadu nia deklarasaun hotu, defeza aseita ho pedidu prokuradór nian.

Desizaun

Antes tama ba iha desizaun tribunál halo alterasaun ba iha kazu ofensa ba integridade fízika simples ba fali iha ofensa ba integridade fízika simples ho natureza violénsia doméstika ho

razaun katak arguidu hasoru nia banin mane no durante ne'e sira dependensia ekonomia ba malu no kona-ba krime arma brankas tribunál mantein nafatin.

Depoisse avalia faktu hotu, tribunál prova katak arguidu sona duni lezadu nia kotuk laran ho tudik rezulta kanek. Bazeia ba faktu provadu ne'e, tribunál kondena arguidu ba krime ofensa ba integridade física simples ho natureza violénsia domestika ho pena parselar fulan neen. Entretantu ba krime arma brankas, tribunál kondena arguidu ho pena tinan tolu. Hosi pena rua ne'e, tribunál halo akumulasaun no kondena arguidu ho pena prizaun tinan tolu suspende ba tinan tolu.

8. Krime ofensa ba integridade física simples ho natureza violénsia doméstika

Nú. Prosesu : 0063/19.ALSIC
Kompozisaun Tribunál : Singulár
Juis : Dr. Evangelino Belo
Prokuradór : Dr. Hipólito Exposto Martins Santa
Defeza : Dr. Germano Guterres Ramos
Desizaun : Pena prizaun tinan 1 suspende ba tinan 1 fulan 6

Iha 06 Feveireiru 2020, Tribunál Distritál Dili liuhusi julgamentu móvel iha Distritu Aileu prezide julgamentu leitura sentensa ba krime ofensa ba integridade física simples ho natureza violénsia doméstika ne'ebé envolve arguidu AR hasoru nia feen, iha Distritu Aileu.

Akuzasaun Prokuradór

Prokuradór akuza katak iha 05 Outubru 2019, maizumenus iha oras tuku 16:00 lokraik bainhira lezada fila hosi ospital, arguidu foti kedas au-kabuar pedasuk natoon ida no baku dala haat iha lezada nia kotuk laran, hafoin arguidu baku dala barak iha lezada nia isin-loloon rezulta bubu. Nune'e lezada halai ba kesar iha polísia.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu konfesa faktu sira iha akuzasaun no deklarata katak lezada sai husi uma semana ida ona no foin fila ba uma. Maibé arguidu deklarata katak sira di'ak malu ona no arguidu kontinua tau-matan ba lezada ho sira nia oan na'in haat. Arguidu mós la baku ona lezada to'o agora.

Aleinde ne'e lezada mós kontinua konfirma faktu sira iha hotu iha akuzasaun no deklarata katak to'o agora arguidu la baku tan ona lezada. Lezada hatutan katak semana ida lezada sai husi uma tanba lezada ba hein nia alin ne'ebé moras iha ospital.

Alegasaun final

Prokuradór konsidera arguidu halo duni agresaun sira iha akuzasaun hasoru lezada nu'udar arguidu nia feen. Tanba ne'e, mezmú arguidu arrepende, di'ak malu ona ho lezada no arguidu mak sustenta sira nia oan no lezada maibé atu halo prevensaun ba futuru, husu ba tribunál atu kondena arguidu ho pena prizaun tinan ida fulan neen suspende ba tinan tolu.

Entretantu defeza konsidera arguidu konfesa faktu sira hotu iha akuzasaun no arrepende ona ninia hahalok, tanba ne'e husu ba tribunál atu kondena arguidu ho pena ne'ebé adekuadu.

Desizaun

Depoide avalia faktu hotu, tribunál prova katak arguidu baku dala haat iha lezada nia kotuk laran uza au-kabuar pedasuk natoon ida no baku dala barak iha lezada nia isin-loloon. Bazeia ba faktu provadu ne'e no tetu mós ba sirkunstánsia atenuante sira hanesan arguidu arrepende ona ninia hahalok, di'ak malu ona ho lezada no kontinua sustenta nia família, nune'e tribunál konklui prosesu ne'e no kondena arguidu ho pena prizaun tinan ida suspende ba tinan ida fulan neen.

9. Krime ofensa ba integridade física simples ho natureza violénsia doméstika

Nú. Prosesu	: 0012/18.ALSIC
Kompozisaun Tribunál	: Singulár
Juis	: Dr. Afonso Carmona
Prokuradór	: Dr. Hipólito Exposto Martins Santa
Defeza	: Dr. Germano Guterres Ramos
Desizaun	: Pena prizaun fulan 3 suspende ba tinan 1

Iha 06 Feveireiru 2020, Tribunál Distritál Dili liuhusi julgamentu móvel iha Distritu Aileu prezide julgamentu leitura sentensa ba krime ofensa ba integridade física simples ho natureza violénsia doméstika ne'ebé envolve arguidu LR hasoru nia feen, iha Distritu Aileu.

Akuzasaun Prokuradór

Prokuradór akuza katak iha loron ne'ebé la apura maibé iha tinan 2018, arguidu lee mensajen ida tama iha lezada nia telefone ne'ebé husu atu hasoru malu ho lezada iha lokraik. Nune'e, iha lokraik refere, arguidu ba tuir lezada no haree lezada hasoru duni mane ida ne'ebé arguidu la koñese. Arguidu hakat ba lezada no basa dala haat iha lezada nia hasan sorin karuk no loos no tuku dala haat iha lezada nia kabun.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu deklara katak iha faktu balun loos no balun la loos. Arguidu rejenta tuku dala haat iha lezada nia kabun. Arguidu rekoñese basa dala haat iha lezada nia hasan sorin karuk no loos. Arguidu hatutan katak nia tuku dala haat mane deskoñesidu ne'e. Maski nune'e, arguidu arrepende ninia hahalok, depoisde fulan haat arguidu ho lezada di'ak malu fali no to'ogora arguidu tau-matan ba lezada ho sira nia oan. Perante tribunál, arguidu mós promete sei la baku tan ona lezada.

Entretantu lezada konfirma arguidu nia deklarasaun katak arguidu basa dala haat no di'ak malu ona ho arguidu deposide fulan haat. Lezada hatutan katak arguidu ho nia família ba bolu lezada iha lezada nia inan aman nia uma no rezolve problema ne'e liuhusi kustume timor nian.

Alegasaun final

Prokuradór konsidera arguidu provadu halo duni agresaun sira iha akuzasaun hasoru lezada, nune'e mezmú arguidu ho lezada di'ak malu ona no arguidu arrepende ona nia hahalok maibé atu halo prevensaun iha futuru, husu ba tribunál atu kondena arguidu ho pena prizaun tinan ida suspende ba tinan rua.

Defeza konsidera arguidu deklara deit faktu ne'ebé nia komete no lezada mós konfirma ho arguidu nia deklarasaun, arrepende ona ninia hahalok no di'ak malu ona ho lezada. Aleinde ne'e, arguidu promete ona ba tribunál katak sei la repete tan hahalok hanesan iha futuru. Tanba ne'e, husu ba tribunál atu kondena arguidu ho pena ne'ebé adekuadu.

Desizaun

Depoisde avalia faktu hotu, tribunál prova katak arguidu basa dala haat iha lezada nia hasan. Bazeia ba faktu ne'e inklui tetu sirkunstánsia atenuante sira hanesan arguidu ho lezada di'ak malu ona, kontinua moris hamutuk hanesan feen ho la'en, arguidu mós arrepende ona ninia hahalok no kontinua sustenta lezada ho sira nia ona na'in tolu, nune'e, tribunál kondena arguidu ho pena prizaun fulan tolu suspende ba tinan ida.

10. Krime kondusaun sein karta

Nú. Prosesu	: 0012/19/ALSTR
Kompozisaun Tribunál	: Singulár
Juis	: Dr. Antonio José Fonseca Monteiro de Jesus
Prokuradór	: Dr. Hipólito Exposto Martins Santa
Defeza	: Dr. Germano Guterres Ramos
Desizaun	: Pena multa US\$22.50

Iha 06 Feveireiru 2020, Tribunál Distritál Dili liuhusi julgamentu móvel iha Distritu Aileu prezide julgamentu leitura sentensa ba krime kondusaun sein karta ne'ebé envolve arguidu Vicente Xavier hasoru Estadu RDTL, iha Distritu Aileu.

Akuzasaun Prokuradór

Prokuradór akuza katak iha 09 Jullu 2019, maizumenus tuku 09:20 dadeer, polísia tranzitu halo auto-stop ba iha kareta ho motor iha área suku Liurai, Distritu Ainaro. Iha momentu ne'ebá arguidu kondús motorizada ho marka Yamaha Yupiter ho xapa matrikula I-0122 TL hosi diresaun Dili atu ba Distritu Kovalima. Bainhira polísia halo pasa revista ba iha dokumentu motorizada arguidu nian, polísia diskobre katak arguidu laiha karta kondusaun, nune'e polísia halo kedan aprensaun ba arguidu nia motorizada.

Prokuradór akuza arguidu kontra artigu 207 KP kona-ba kondusaun sein karta ho moldura penál to'o tinan 3 ka multa.

Produsaun ba prova sira

Iha tribunál, arguidu konfesa faktu hotu iha akuzasaun no deklara katak arrepende ninia hahalok no promete sei la kondús ona motorizada bainhira seidauk iha karta kondusaun.

Alegasaun finál

Prokuradór konsidera arguidu komete duni faktu sira iha akuzasaun. Maibé mezmú arguidu sei estudante no arguidu arrepende ninia hahalok, husu ba tribunál atu kondena arguidu ho pena multa US\$60.00 ne'ebé lora ida arguidu selu sei US\$ 0.50 durante lora 120 ho pena alternativa durante fulan tolu kumpri iha prizaun kuandu la selu pena multa ne'e.

Entretantu defeza husu ba tribunál atu kondena arguidu ho pena admoestasaun tanba arguidu konfesa faktu, arrepende ona ninia hahalok no arguidu nu'udar estudante.

Desizaun

Depoizde avalia faktu hotu, tribunál prova katak arguidu provadu kondús motorizada sein karta kondusaun. Bazeia ba faktu sira ne'e, tribunál kondena arguidu ho pena multa US\$22.50 ne'ebé kada lora arguidu sei selu 0.50 durante lora 45. Tribunál mós hatun despaxu polísia hodi entrega filafali arguidu nia motorizada.

11. Krime arma brankas

Nú. Prosesu : 0187/19. PDDIL
Kompozisaun Tribunál : Koletivu
Juis : Dr. Antonio Helder Viana do Carmo, Dra. Albertina da
Conceição Neves, Dra. Sribuana da Costa
Prokuradór : Dr. Domingos Barreto

Defeza : Dr. Angelmo Pinto (Estajiáriu)
Desizaun : Pena prizaun tinan 3 suspende ba tinan 5

Iha 07 Feveireiru 2020, Tribunál Distritál Dili prezide julgamentu leitura akordaun ba krime arma brankas ne'ebé envolve arguidu Marcelino Soares Salsinha hasoru lezadu Agustino Jose Fernandes, iha Distritu Dili.

Akuzasaun prokuradór

Prokuradór akuza katak iha fulan Abril 2019, oras la lembra maibé madrugada lezadu ho nia família sira sei toba hela, tanba rai sei nakukun. Arguidu mai hakilar no tolok lezadu dala barak. Lezadu rona ida ne'e, lezadu hadeer no hateten ba arguidu katak kuandu iha problema ruma, mai ko'alia ba malu deit, la'os tolok tun sae iha estrada. Arguidu hatan fali ho sadik haruka lezadu ho nia oan ba taa malu ho arguidu. Depoisde koa'lia hanesan ne'e, arguidu ba foti katana iha nia uma no ba fali iha lezadu nia uma. Arguidu taa dala rua iha lezadu nia liman rezulta jaketa nakles maibé liman la kanek tanba lezadu uza jaketa. Lezadu konsege hadau tiha katana hosi arguidu nia liman.

Prokuradór akuza arguidu kontra artigu krime arma brankas artigu 2 Nú. 1 alinea b no artigu 20 Nú. 1 husi Lei Nú. 5/2017.

Produsaun ba prova sira

Iha prosesu julgamentu, arguidu konfesa parsialmente faktu ne'ebé akuza hasoru nia no deklarata katak lezadu duun arguidu na'ok nia kapasete tanba ne'e mak arguidu moe no ba hemu tua lanu mak iha madrugada ba hakilar no tolok lezadu. Arguidu hatutan katak arguidu ba foti katana iha nia kolega nia uma hodi hata'uk deit lezadu no la'os atu taa lezadu. Arguidu mós deklarata katak foin primeiravés mai tribunál no arrepende ninia hahalok.

Iha parte seluk lezadu konfirma hotu faktu sira iha akuzasaun no deklarata katak arguidu ho katana taa primeiru maibé la kona no taa segundu mak kona iha lezadu nia liman maibé la rezulta liman kanek tanba lezadu uza jaketa.

Testemuña Fransisco Soares Rangel nu'udar lezadu nia mane foun depoimenta katak loos duni iha momentu ne'ebá arguidu hemu tua lanu mai hakilar no tolok lezadu. Kona-ba taa lezadu, testemuña la haree ho matan maibé so haree deit arguidu kaer katana no haree arguidu ho lezadu hakuak malu hodi hadau malu katana.

Testemuña Esterlino Benevides Jose Fernandes nu'udar arguidu nia oan mane depoimenta katak arguidu mai lezadu nia uma hakilar no tolok lezadu no kaer katana iha liman maibé testemuña la haree arguidu taa lezadu so haree deit arguidu ho lezadu hakuak malu no hadau malu katana deit.

Alegasaun finál

Prokuradór haktuir katak arguidu konfesa parsialmente ba faktu sira ne'ebé akuza hasoru nia katak kaer duni katana maibé hodi hata'uk deit lezadu. Iha deklarasaun lezadu nian katak taa dala primeiru la kona no kona bainhira taa ba dala segundu maibé la rezulta kanek. Testemuña sira mós la haree ho matan arguidu taa lezadu. Maski nune'e, prova duni arguidu uza katana taa lezadu maibé la kanek. Tanba ne'e, husu ba tribunál atu kondena arguidu ho pena prizaun tinan haat.

Alende ne'e defeza husu ba tribunál atu kondena arguidu ho suspensaun ba pena prizaun tanba kaer katana hodi ameasa deit lezadu la'os atu taa lezadu, arguidu arrepende ninia hahalok no foin primeriavés mai tribunál.

Desizaun

Depoizde avalia hotu faktu sira hotu ne'ebé produs iha julgamentu, tribunál prova katak arguidu tolok no kaer duni katana iha liman hodi hata'uk lezadu, tanba ne'e tribunal konklui prosesu ne'e no kondena arguidu ho pena prizaun tinan tolu suspende ba tinan lima.

12. Krime ofensa ba integridade fízika simples

Nú. Prosesu	: 0001/19.ALALV
Kompozisaun Tribunál	: Singulár
Juis	: Dr. Evangelino Belo
Prokuradór	: Dr. Pedro Baptista dos Santos
Defeza	: Dr. Germano Guterres Ramos
Desizaun	: Absolve

Iha 07 Feveireiru 2020, Tribunál Distritál Dili liuhusi julgamentu móvel iha Distritu Aileu prezide julgamentu leitura sentensa ba krime ofensa ba integridade fízika simples ne'ebé envolve arguida AS hasoru lezada AJA nu'udar viziña, iha Distritu Aileu.

Akuzasaun Prokuradór

Prokuradór akuza katak iha 08 Abril 2019, maizumenus iha oras tuku 11:00 dadeer, lezada fila hosi hanorin eskola no bainhira la'o liu arguida nia uma oin, arguida baku mákina fotografia ho marka Canon ne'ebé lezada ka'er hela halo monu ba rai. Bainhira lezada hakruuk atu foti hikas mákina fotografia ne'e, arguida dudu lezada monu ba rai rezulta inus kanek no ran sai barak.

Prokuradór akuza arguidu kontra artigu 145 hosi KP kona-ba ofensa ba integridade fízika simples ho moldura penál to'o tinan 3 ka multa.

Produsaun ba prova sira

Iha julgamentu, arguida rejeita faktu balun katak la dudu monu lezada ba rai rezulta inus kanek no ran sai barak maibé bainhira arguida baku monu lezada nia mákina fotografia, lezada ho nia la'en ka'er arguida nia liman no latan arguida ba rai maka lezada nia ain kait ba iha arguida nia ain hodi rezulta lezada monu no inus kona-ba iha rai. Arguida hatutan katak nia baku monu duni lezada nia mákina fotografía tanba lezada uza mákina ne'e atu hasai fali arguida nia uma no arguida nia an.

Entretantu lezada kontinua konfirma faktu sira iha akuzasaun no hatutan katak bainhira nia to'o iha uma husi hanorin eskola, nia rona arguida tolok tanba distánsia entre sira nia uma ho metru 10. Bainhira lezada hamriik hela iha nia uma, arguida mai baku liu mákina fotografia iha lezada nia liman laran no loos duni katak nia la sente ema ruma dudu nia maibé derrepente lezada monu ba rai rezulta inus kanek no ran sai barak.

Testemuña Luis Gonzaga nu'udár lezada nia la'en depoimenta katak nia haree duni arguida no lezada tolok malu no arguida baku monu lezada nia mákina fotografia. Testemuña hatutan katak loos duni lezada monu ba rai no ran sai hosi inus, maibé nia la haree katak arguida mak dudu monu lezada ba rai.

Alegasaun finál

Prokuradór konsidera arguida provadu komete faktu sira iha akuzasaun tanba arguida konfesa katak nia duni mak baku monu lezada nia mákina fotografia, nune'e mezmu arguida nega katak nia la dudu monu lezada maibé realidade sira diskute malu tanba disputa rai. Tanba ne'e, atu halo prevensaun iha futuru, husu ba tribunál atu kondena arguida ho pena prizaun fulan neen suspende ba tinan ida.

Defeza husu ba tribunál atu absolve arguida tanba la'os arguida mak dudu monu lezada ba rai maibé lezada nia ain mak selok kona arguida nia ain hodi monu ba rai. Faktu ida ne'e konfirma mós ho depoimentu husi testemuña Luis Gonzaga nu'udar lezada nia la'en.

Desizaun

Depoizde avalia faktu hotu, tribunál konsidera la'os arguida mak dudu monu lezada ba rai maibé kanek ne'ebé lezada hetan tanba lezada monu rasik bainhira nia ain kait ba iha arguida nia ain. Ida ne'e bazeia ba lezada nia deklarasaun katak nia rasik mós sente katak nia mesak monu no faktu ida ne'e konfirma mós husi lezada nia la'en. Bazeia ba faktu hirak ne'e hotu no tetu ba sirkunstánsia sira hotu, tribunál konklui prosesu no absolve arguida husi prosesu ida ne'e.

13. Krime ofensa ba integridade física simples ho natureza violénsia doméstika

Nú. Prosesu : 0091/18.LILIQ
Kompozisaun Tribunál : Singulár

Juis : Dra. Maria Modesta de Almeida Viera
Prokuradór : Dr. Rafael Jeronimo Gusmão
Defeza : Dr. João de Carvalho
Desizaun : Pena prizaun fulan 4 suspende ba tinan 1

Iha 11 Feveiru 2020, Tribunál Distritál Dili prezide julgamentu leitura sentensa ba krime ofensa ba integridade física simples ho natureza violénsia doméstika ne'ebé envolve arguidu JdS hasoru nia feen, iha Distritu Likisá.

Akuzasaun Prokuradór

Prokuradór akuza katak iha 10 Agostu 2018, maizumenus iha oras tuku 17:00 lokraik, arguidu ho lezada diskute malu kona-ba arguidu fa'an tiha lezada nia inan-aman nia fahi maibé osan rezultadu faan fahi ne'e arguidu lakohi entrega ba lezada nia inan-aman. Ho nune'e, arguidu tebe dala ida iha lezada nia knosen karuk halo lezada monu ba rai.

Iha loron tuir mai, 11 Agostu 2018, maizumenus iha oras tuku 18:00 lokraik, arguidu husu nia osan ne'ebé antes ne'e arguidu fó ba lezada rai no bainhira lezada entrega arguidu tuku dala ida iha lezada nia knosen loos no kontinua kedan rakut lezada nia fuuk.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu konfesa faktu hotu iha akuzasaun no deklarata katak arrepende ninia hahalok. Arguidu mós deklarata katak di'ak malu ona ho lezada no arguidu mak serbisu hodi sustenta lezada.

Nune'e mós lezada ne'ebé kontinua konfirma faktu sira iha akuzasaun no deklarata katak sira di'ak malu ona. Lezada mós konfirma deklarasaun arguidu nian katak arguidu mak kontinua tau-matan ba lezada.

Alegasaun final

Prokuradór konsidera arguidu komete duni faktu sira iha akuzasaun tanba arguidu konfesa no konfirma mós hosi lezada. Tanba ne'e, husu ba tribunál atu kondena arguidu ho pena prizaun maibé suspende nia ezekusaun ba tempu naruk.

Entretantu parte defeza husu ba tribunál atu aplika pena adekuaudu ba arguidu tanba arguidu konfesa faktu sira iha akuzasaun, arrepende ona ninia hahalok no di'ak malu ona ho lezada. Aleinde ne'e arguidu kontinua tau-matan ba lezada.

Desizaun

Depoisde avalia faktu hotu, tribunál prova katak arguidu tebe dala ida iha lezada nia knosen karuk halo lezada monu ba rai. Tribunál mós prova katak arguidu tuku dala ida iha lezada nia knosen loos no rakut lezada nia fuuk. Bazeia ba prova sira ne'e no tetu mós sirkunstánsia atenuante iha prosesu ne'e, tribunál konklui no kondena arguidu ho pena prizaun fulan haat suspende ba tinan ida.

14. Kazu sivíl regulasaun ezersísiu podér paternál

Nú. Prosesu : 0834.14.CVTDD.
Kompozisaun Tribunál : Singulár
Juis : Dra. Albertina Neves
Prokuradór : Dr. Gustavo da Silva (reprezenta menór)
Defeza : Dr. Manuel Lito Exposto Silva (peprezenta rekeridu)
Desizaun : Omologa dezisténsia keixa

Iha 11 Feveireiru 2020, Tribunál Distritál Dili prezide julgamentu tentativa konsiliaun ba kazu regulasaun ezersísiu podér paternál ne'ebé envolve autór FdS no JdS ho idade menoridade, tinan 12 ho 13 hasoru rekerente AS ho ET nu'udar autór nia inan-aman, iha Distritu Dili.

Termu no fundamentu sira

Menór JdS durante ne'e hela hamutuk ho nia avo feto hosi rekeridu nia inan no FdS hela ho rekerente na'in rua nu'udar inan-aman. Maibé bainhira menór na'in rua nia aman ba tiha serbisu iha Inglaterra, komesa iha problema entre menór nia inan no aman, nune'e menór na'in rua nia inan ba foti tiha menór JdS hosi sira nia avo feto iha Likisá. Hahuu hosi ne'ebá menór na'in rua nia aman la haruka ona osan ba menór na'in rua.

Kazu ne'e relaciona ho ezersísiu podér paternál tuir artigu 1757 to'o 1762 to'o 1782 Kodigu Sivíl kona-ba ezersísiu podér paternál no artigu 1804 to'o 1805 KS kona-ba alimentasaun ba ménor.

Tentativa konsilisaun

Iha julgamentu, menór FdS no JdS hili hakarak hela ho sira nia inan no deklara katak sira kontinua eskola mezmu sira nia aman la haruka osan ba sira tanba sira nia inan faan dosi mak hodi fó han no selu sira nia eskola. Entretantu menór na'in rua nia aman ne'ebé marka mós prezensa iha julgamentu ne'e deklara katak nia simu menór na'in rua nia desizaun hodi hili liu hela ho sira nia inan no nia prontu haruka osan US\$100.00 kada fulan liu husi *Western Union* no nia alin mak sei ba foti no hatama ba menór na'in rua nia konta bankária. Kona-ba vizita, tribunál husu ba menór na'in rua nia inan atu la bele bandu menór sira nia aman atu vizita menór sira.

Entretantu menór sira nia inan konkorda ho osan US\$100.00, direitu menór nia aman hodi vizita inklui foti menor sira ba halimar iha sira nia aman.

Alegasaun final

Prokuradór representa menór no defeza representa rekeridu husu ba tribunál atu omologa akordu ne'ebé rekeridu no rekerida konkorda hamutuk atu tau-matan ba menór.

Desizaun

Parte rua nia akordu kona-ba alimentasaun atu menór sira nia aman sei haruka osan ho kuantia US\$100.00 kada fulan ba ménor na'in rua nia konta bankária. Kona-ba hela fatin no rejime vizita, parte rua iha akordu atu menór na'in rua hela ho sira nia inan hodi eskola no aman iha direitu ba vizita inklui lori menór sira ba iha aman nia uma. Bazeia ba parte rua nia akordu ne'e, tribunál konklui no omologa akordu ne'e.

15. Krime la halotuir obrigasaun alimentár

Nú. Prosesu	: 0510/19.ERERM
Kompozisaun Tribunál	: Singulár
Juis	: Dra. Maria Modesta
Prokuradór	: Dr. Pedro Baptista
Defeza	: Dr. Fernando Lopez
Desizaun	: Absolve

Iha 13 Feveireiru 2020, Tribunál Distritál Dili hala'o julgamentu leitura sentena ba krime la halotuir obrigasaun alimentár ne'ebé envolve arguidu DdS hasoru lezada BS, iha Distritu Ermera.

Akuzasaun Prokuradór

Prokuradro akuza katak iha loron la apura maibé iha fulan Dezembru 2017, arguidu ho lezada koñese malu no komesa kontaktu malu hodi hasoru malu no arguidu promete ba lezada atu foti lezada sai nia feen. Iha fulan no tinan ne'ebé hanesan, arguidu husu ba lezada atu halo relasaun seksuál ho lezada maibé lezada lakohi. Ho nune'e arguidu ameasa sei oho mate tiha lezada.

Tanba ta'uk ho arguidu nia ameasa ne'e, lezada halo duni relasaun seksuál ho arguidu. Arguidu no lezada continua halo relasaun seksuál to'o Feveireiru 2018. Maibé depoisde ida ne'e arguidu la hasoru ona lezada. Tanba ne'e, iha Marsu 2018, lezada kontaktu ba arguidu no informa ba arguidu katak nia isin rua. Rona lezada koa'lia hanesan ne'e, arguidu haruka lezada atu halo abortu ho hemu tua manas. Depoisde ne'e, arguidu la kontaktu tan ona lezada. Iha Dezembru 2018, lezada partu oan kaduak feto ida no mane ida sein arguidu nia tau-matan. Lezada nia inan-aman mak tau matan bebe na'in rua ne'e.

Prokuradór akuza arguidu kontra artigu 225 KP kona-ba la halotuir obrigasaun alimentár ho moldura penál to'o tinan 3 ka multa.

Produsaun ba prova sira

Ba tribunál, arguidu rejeita faktu balun katak nia la haruka lezada halo abortu ho hemu tua manas maibé rekoñese katak lezada telefone duni arguidu hodi informa kona-ba lezada isin-rua ona. Arguidu kontinua deklara katak arguidu mós hakarak responsabiliza ba labarik na'in rua ne'e, maibé lezada ho nia família hakarak atu arguidu tenke lori osan US\$5,000.00 ho karau ida fo'in bele haree nia oan na'in rua. Montante refere arguidu deklara katak nia la iha kbiit maibé iha momentu ne'ebá arguidu ho nia família sira lori duni osan US\$1,000.00 ho karau ida ba lezada nia família maibé lezada nia família la simu. Desde hosi ne'ebá, arguidu la telefone ona lezada no la ba haree nia oan na'in rua.

Entretantu lezada kontinua mai konfirma faktu sira iha akuzasaun no deklara katak loos duni lezada nia família hakarak arguidu lori duni osan US\$5,000.00 ho karau ida foin bele mai haree labarrik na'in rua. Lezada hatutan katak iha momentu ne'ebá arguidu ho nia família lori osan US\$500.00 ho karau ida la'os US\$1,000.00. Nune'e lezada nia família lakohi simu arguidu. Lezada deklara tan katak depoisde lezada isin-rua, lezada foin hatene katak arguidu iha feen ona.

Tuir testemuña FS nu'udar lezada nia aman depoimenta katak nia no família la hatene relasaun entre arguidu ho lezada no foin hatene bainhira lezada isin-rua ona. Testemuña konfirma mós katak sira la bandu arguidu mai haree nia oan sira tanba momentu ne'ebá bainhira hatene lezada isin-rua ona, sira husu ba arguidu atu lori osan US\$5,000.00 ho karau ida maibé arguidu mai lori de'it fali osan US\$500.00 no karau ida.

Alegasaun finál

Prokuradór konsidera arguida nia hahalok ne'e la prenxe elementu sira hosi krime la halotuir obrigasaun alimentár bazeia arguidu ninia deklarasaun no konfirma mós ho lezada no lezada nia aman katak arguidu hakarak tau-matan ba sira nia oan maibé lezada nia família mak lakohi no hakarak arguidu fó sala ho karau ida no osan US\$5,000.00. Maibé arguidu laiha kapasidade. Haree ba faktu sira ne'e hotu, husu ba tribunál atu absolve arguidu hosi krime ne'e.

Defeza konkorda ho prokuradór nia alegasaun tanba arguidu hakarak tau-matan ba nia oan maibé lezada ho ninia família hakarak arguidu tenke entrega osan US\$5,000.00 ho karau ida, maibé arguidu laiha kapasidade hodi kumpri pedidu ne'e. Tanba ne'e, husu ba tribunál atu absolve arguidu hosi krime ne'e.

Desizaun

Depoisde avalia faktu hotu, tribunál prova katak arguidu iha duni relasaun namora to'o lezada isin rua no hahoris labarik kaduak na'in rua. Entretantu kona-ba krime la halotuir obrigasaun

alimentár, tribunál la prova tanba la'os arguidu mak lakohi tau-matan ba nia oan sira maibé tanba pedidu husi família ne'ebé boot, obriga arguidu tenke fó osan US\$5,000.00 ho karau ida no arguidu iha deit kapasidade US\$500.00 no karau ida, nune'e família lezada nian bandu arguidu atu vizita labarik sira. Bazeia ba faktu provadu no la provadu inklui sirkunstánsia sira hotu, tribunál absolve arguidu hosi krime ne'e.

16. Krime ofensa ba integridade fízika grave

Nú. Prosesu : 0321/16. EREM
Kompozisaun Tribunál : Koletivu
Juis : Dra. Albertina da Conceição Neves, Dr. Antonio Helder Viana do Carmo, Dra. Sribuana da Costa
Prokuradór : Dr. Osorio de Deus
Defeza : Dr. Estaquie Pereira Guterres
Desizaun : Pena prizaun fulan 6 suspende ba tinan 1, pena prizaun fulan 3 suspende ba tinan 1 no absolve

Iha 17 Feveireiru 2020, Tribunál Distritál Dili prezide leitura akordaun ba krime ofensa ba integridade fízika grave ne'ebé envolve arguidu na'in tolu, Igidio Maria de Jesus Gomes, Cornelio Jito Pereira no Marcos da Silva hasoru lezadu Duarte da Silva, iha Distritu Ermera.

Akuzasaun Prokuradór

Prokuradór akuza katak iha 06 Outubru 2016, iha oras tuku 01:00 madrugada, lezadu asiste hela festa ida iha suku Lisapat ne'ebé organiza hosi estudante Institute of Business (IOB) sira, iha momentu ne'ebá arguidu sira hemu tua to'o lanu. Arguidu Igidio Maria de Jesus Gomes tuku dala ida iha lezadu niaibun rezulta nehan ida monu. Arguidu Cornelio Jito Pereira tuku dala ida iha iha lezadu nia kabaas no arguidu Marcos da Silva mak sori arguidu Igidio no lezadu. Depoisde akontesimentu ne'e, iha dadeer arguidu na'in tolu ba lezadu nia uma no husu deskulpa ba iha nia família no autoridade lokál nia oin no fó osan US\$260.00 no karau ida ba lezadu no prontu atu troka lezadu nia nehan ho nehan falsu tanba sira mesak família. Entretantu lezadu fó fali tais ba arguidu sira.

Prokuradór akuza arguidu sira kontra artigu 146 KP kona-ba ofensa ba integridade fízika grave ho moldura penál tinan 2 to'o tinan 8 prizaun.

Produsaun ba prova sira

Iha prosesu julgamentu, arguidu na'in tolu konfesa no konfirma hotu faktu sira ne'ebé akuza hasoru sira. Maibé arguidu Igidio hatutan katak bainhira nia lezadu niaibun nia la haree lezada nia nehan monu. Arguidu sira mós deklara katak depoisde akontesimentu ne'e, arguidu sira ba iha lezadu nia uma no husu deskulpa ba lezadu iha família no autoridade lokál sira nia oin. Arguidu sira entrega osan US\$260.00 no karau ida ba lezadu no agora dadaun sira haree malu

diak. Arguidu sira mós arrepende sira nniia hahalok no foin primeiravés mai hatan iha tribunál.

Tribunál decide la rona ona lezadu nia deklarasaun tanba tribunál notifika lezadu dala tolu ona maibé la marka prezensa.

Alegasaun final

Prokuradór laiha duvida ba faktu sira tanba ne'e husu ba tribunál atu kondena arguidu sira tuir artigu 146 KP maibé tribunál mós tetu hotu ba iha sirkunstánsia sira ne'ebé mak iha hanesan arguidu sira konfesa, husu ona deskulpa ba lezadu no fó ona osan no karau ba lezadu.

Entretantu defeza husu ba tribunál atu absolve arguidu sira hosi krime ne'e tanba problema ne'e, rezolve ona iha família no autoridade lokál nia oin hodi entrega osan no karau ba lezadu. Aleinde ne'e, arguidu sira mós arrepende ona sira ninia hahalok no di'ak malu ona ho lezadu.

Desizaun

Depoide avalia faktu hotu, tribunál prova katak arguidu Igidio Maria de Jesus Gomes tuku dala ida iha lezadu nia ibun rezulta nehan ida monu no arguidu Cornelio Jito Pereira tuku dala ida iha iha lezadu nia kaba'as. Bazeia ba faktu provadu sira ne'e no tetu sirkunstánsia katak sira di'ak malu ona liuhusi kustume timor nian, tribunál kondena arguidu Igidio ho pena prizaun fulan neen suspende ba tinan ida. Arguidu Cornelio tribunál kondena ho pena prizaun fulan neen suspende ba tinan ida. Entretantu arguidu Marcos tribunál absolve tanba ba sori deit arguidu Igidio ne'ebé tuku lezadu.

17. Krime ofensa ba integridade física simples ho natureza violénsia doméstika

Nú. Prosesu	: 0147/19.LILIQ
Kompozisaun Tribunál	: Singulár
Juis	: Dr. Antonio José Fonseca Monteiro de Jesus
Prokuradór	: Dr. Nelson de Carvalho
Defeza	: Dr. Jonas Henrique da Costa
Desizaun	: Pena multa US\$120.00

Iha 18 Feveiru 2020, Tribunál Distritál Dili prezide julgamentu leitura sentensa ba krime ofensa ba integridade física simples ho natureza violénsia doméstika ne'ebé envolve arguidu ABB hasoru nia feen, iha Distritu Likisá.

Akuzasaun Prokuradór

Prokuradór akuza katak iha 07 Dezembru 2019, maizumenus iha oras tuku 21:00 kalan, arguidu rona lezada ko'alia hela iha telefone ho nia eis namorado. Arguidu tebe dala ida iha lezada nia kanotak halo lezada monu tuun ba rai, arguidu rasta lezada nia liman no lori ai-sanak ki'ik baku lezada nia tilun-hun. Arguidu mós tuku tan dala ida iha lezada nia ibun no duni sai lezada hosi

uma maibé lezada lakohi sai. Ho nune'e arguidu tebe lezada nia kabun halo lezada monu tuun tan ba rai. Aktu sira ne'e rezulta lezada sente moras iha nia isin-loloon nune'e lezada halai ba kesar kedas iha polísia.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Iha tribunál, arguidu rejenta faktu balun katak arguidu la tebe lezada nia kanotak to'o lezada monu tuun ba rai. Arguidu mós la uza ai-pedasuk ki'ik hodi baku lezada nia tilun-hun no la tuku iha ibun. Arguidu mós rejenta katak la tuku lezada nia kabun to'o lezada monu tuun ba rai. Arguidu rekoñese katak tebe lezada nia kotuk, tuku dala ida iha lezada nia kidan no duni sai lezada hosi uma. Mezmu nune'e, arguida deklarata katak sira di'ak malu ona no arguidu promete perante ba tribunál sei la repete tan ninia hahalok hanesan iha futuru.

Enkuantu lezada kontinua konfirma faktu sira iha akuzasaun no konfirma mós deklarasaun arguidu nian katak sira di'ak malu ona no to'o agora arguidu la baku tan ona lezada.

Alegasaun finál

Prokuradór konsidera arguida komete duni faktu sira iha akuzasaun tanba mezmu arguidu konfesa ba faktu balun deit maibé lezada kontinua konfirma faktu hotu iha akuzasaun. Tetu mós ba sirkunstánsia atenuante sira hanesan arguidu konfesa, di'ak malu ona ho lezada no kontinua moris hamutuk hanesan feen ho la'en, nune'e husu ba tribunál atu kondena arguidu ho pena admoestasaun.

Nune'e mós defeza konkorda ho pedidu prokuradór nian no husu ba tribunál atu kondena arguidu ho pena admoestasaun tanba konsidera sirkunstánsia atenuante sira hanesan arguidu konfesa, arrepende ona ninia hahalok no dame malu ona ho lezada. Arguidu mós promete perante tribunál katak sei la repete tan hahalok hanesan iha futuru.

Desizaun

Depoide avalia faktu hotu, tribunál a favor liu ba lezada nia deklarasaun no prova katak arguidu tebe dala ida iha lezada nia kanotak halo lezada monu tuun ba rai, rasta lezada nia liman no kontinua lori ai-sanak kiik baku lezada nia tilun-hun. Tribunál mós prova katak arguidu tuku dala ida iha lezada nia ibun no duni sai lezada hosi uma maibé tanba lezada lakohi sai, nune'e arguidu tebe lezada nia kabun halo lezada monu tan ba rai.

Bazeia ba prova sira ne'e no tetu ba sirkunstánsia sira hotu, tribunál kondena arguidu ho pena multa US\$120.00 ne'ebé kada loron arguidu sei selu US\$1.00 durante loron 120. Bainhira

arguidu la selu pena multa refere, arguidu sei kumpri iha prizaun durante fulan haat nu'udar pena alternativu.

18. Krime abuzu seksuál ba menór ho agravaun

Nú. Prosesu : 0006/17. DIATR
Kompozisaun Tribunál : Koletivu
Juis : Dra. Albertina da Conceição das Neves, Dra. Sribuana da Costa,
Dr. António Helder Viana do Carmo
Prokuradór : Dra. Bemvinda da Costa do Rosario
Defeza : Dra. Cesaltina Conceição Freitas
Desizaun : Pena prizaun 12

Iha 19 Feveireiru 2020, Tribunál Distritál Dili prezide julgamentu leitura akordaun ba krime abuzu seksuál ba menór ho agravaun ne'ebé envolve arguidu CF hasoru lezada EdA ho idade tinan 6 fulan 9, iha Distritu Dili.

Akuzasaun Prokuradór

Prokuradór akuza iha katak iha loron ne'ebé la apura maibé iha tinan 2014, lezada nia aman haruka lezada ba hela iha nia tian iha Atauro hodi eskola iha infantil Atauro. Iha 2017, iha loron ne'ebé la apura, bainhira lezada ho nia kolega halimar hela iha sira nia uma oin, arguidu bosok lezada atu fo'o osan US\$0.50 no haruka lezada ba arguidu nia uma. Lezada mós ba arguidu nia uma no arguidu haruka lezada tama kedas ba kuartu-laran hafoin arguidu tama tuir lezada ba kuartu-laran. Bainhira arguidu ho lezada iha kuartu-laran arguidu komesa loke kedas lezada nia roupa no halo relasaun seksuál.

Arguidu halo relasaun seksuál ho lezada hamutuk dala tolu (3), primeiru halo iha rezidénsia pastoral, tuir mai halo iha iha arguidu nia uma rasik no ikus halo iha iha lezada nia uma. Kazu ne'e deskobre sai tanba lezada nia primu EDA goza lezada halo relasaun seksuál ho arguidu tanba nia ka'er toman dala ida iha sira nia uma nune'e lezada moe no ba konta hotu arguidu nia hahalok ba lezada nia tian nune'e lezada nia tian ba hato'o keixa iha polísia.

Prokuradór akuza arguidu kontra artigu 177 (1) KP kona-ba abuzu seksuál ba menór ho moldura penál tinan 5 to'o tinan 20 prizaun no kontra artigu 182 (1d) KP kona-ba agravaun. Prokuradór mós akuza arguidu kontra artigu 35 kona-ba krime iha konkursu no artigu 52 Nú. 2 kona-ba sirkuntánsia agravante jerál tanba idade.

Produsaun ba prova sira¹

Testemuña AdA nu'udar lezada nia aman depoimenta katak nia haruka lezada ba hela ho lezada nia tian iha Atauro tanba iha Ainaro laiha eskola Infantíl. Testemuña hatutan katak nia koñese arguidu no konsidera hanesan família, tanba testemuña ho arguidu nu'udar *pendeta* hotu, sempre serbisu hamutuk no sempre hasoru malu iha enkontru kona-ba igreja nian. Testemuña foin hatene kona-ba akontesimentu ne'e bainhira rona tutan husi lezada nia tian ne'ebé telefone direta hodi informa ba arguidu no mós rona tan hosi ECD (lezada nia prima) ne'ebé rona tutan hosi lezada katak arguidu sempre halo relasaun seksuál ho lezada.

Testemuña ECD hanesan lezada nia prima (idade tinan 20) depoimenta katak iha momentu ne'ebá nia haree arguidu halo relasaun seksuál ho lezada. Depoisde akontesimentu ne'e, lezada rasik konta ba testemuña katak arguidu kaer lezada nia hirus-matan no oin lulik hafoin halo relasaun seksuál. Testemuña mós dehan bainhira lezada konta ba testemuña, lezada ho kondisaun trauma no nakdedar.

Testemuña JdA nu'udar lezada nia tiun deklara katak testemuña hela iha Dili no simu telefone husi lezada nia aman iha Distritu Ainaro dehan katak arguidu viola ona lezada. Nune'e testemuña arangka kedas ba Atauro no bainhira to'o iha ne'ebá lezada iha ona ospital halo hela visum.

Testemuña MdA nu'dár lezada nia mestra depoimenta katak nia la haree direta akontesimentu ne'e maibé nia rona tutan hosi lezada ne'ebé konta tuir kona-ba arguidu nia hahalok hasoru lezada.

Alegasaun final

Prokuradór konsidera arguidu provadu komete faktu sira iha akuzasaun, bazeia ba lezada nia konfirmasaun ba faktu sira no depoimentu hosi testemuña sira. Prokuradór haktuir katak arguidu hanesan *pendeta* ida tuir loloos tenke tau-matan ba menór sira la'os halo fali hahalok hanesan ne'e hasoru lezada ne'ebé sei ho idade menór ne'ebé presiza tebe-tebes ema boot nia tau-matan.

Aleinde ne'e, prokuradór husu ba tribunál atu halo alterasaun husi artigu 177 alinea 1 ba fali artigu 177 alinea 2 ho agravasaun artigu 182 (a) KP tanba lezada nia tinan kiik liu tinan 7. Haree ba hahalok arguidu nian ne'e, husu ba tribunál atu kondena arguidu ba kada krime (krime tolu) ho pena tinan 7. Husi pena ba krime tolu ne'e, tribunál akomula hamutuk ba pena prizaun tinan 18.

¹ JSMP la monitoriza bainhira tribunál rona arguidu no lezada nia deklarasaun

Iha parte seluk, defeza husu ba tribunál atu absolve arguidu hosi krime ne'e tanba relatóriu médiku hosi ospital Atauro no relatóriu médiku hosi ospital HNGV la hanesan. Iha relatóriu médiku hosi ospital Atauro deskreve katak, lezada nia orgaun seksuál sofre nakels pontu 15 cm, enkuantu iha relatóriu hosi HNGV deskreve katak lezada nia orgaun seksual ho kondisaun normál no la iha penetrasaun ruma no haree mós lezada la hatudu trauma ruma.

Desizaun

Depoide avalia faktu sira hotu, tribunál prova katak arguidu halo duni abuzu seksuál ba lezada liuhusi bosok lezada atu fó osan US\$0.50 no haruka lezada ba arguidu nia uma. Tribunál prova katak arguidu lori kedas lezada tama ba arguidu nia kuartu-laran no halo relasaun seksuál ho lezada. Tribunál mós prova katak arguidu prátika hahalok hanesan ne'e dala barak ona, primeiru akontese iha rezedénsia pastoral, segundu akontese iha arguidu nia uma no terseiru akontese iha lezada nia uma no lezada nia prima ECD hafuhu hetan arguidu halo hela relasaun seksuál ho lezada.

Bazeia ba faktu provadu sira hotu, relatóriu médiku no tetu mós sirkuntánsia sira hotu, tribunál konklui prosesu ne'e no kondena arguidu ba kada krime ho pena prizaun tinan 6 fulan 8. Husi pena ba kada krime ne'e, tribunál akumulá ba pena únika, pena prizaun tinan 12.

19. Krime ofensa ba integridade fízika simples ho natureza violénsia doméstika

Nú. Prosesu	: 0290/19. DICMR
Kompozisaun Tribunál	: Singulár
Juis	: Dra. Sribuana da Costa
Prokuradór	: Dr. Nelson de Carvalho
Defeza	: Dr. Juvinal Yanes Freitas
Desizaun	: Pena admoestasaun

Iha 21 Fevereiru 2020, Tribunál Distritál Dili, prezide julgamentu no imediata lee sentensa ba krime ofensa ba integridade fízika simples ho natureza violénsia doméstika ne'ebé envolve arguidu JMP hasoru nia feen, iha Distritu Dili.

Akuzasaun prokuradór

Prokuradór akuza katak iha 23 Maiu 2019, iha oras tuku 16:00 lokraik, lezada baku halimar sira nia oan nia kelen nune'e sira nia oan tanis. Bainhira arguidu rona sira nia oan tanis, arguidu foti kadeira masa no baku dala ida iha lezada nia ulun no lori ai-pedasuk dudu iha lezada nia kotuk-laran. Aktu sira ne'e rezulta lezada sofre moras iha ulun no kotuk-laran.

Prokuradór akuza arguidu kontra artigu 145 KP kona-ba krime ofensa ba integridade fízika simples ho moldura penál to'o tinan 3 ka multa konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu konfesa integralmente ba faktu hotu iha akuzasaun no deklarata katak nia komete krime ne'e tanba lezada baku sira nia oan nia kelen no nia oan tanis. Maibe arguidu mos deklarata katak arrepende ninia hahalok, di'ak malu ona ho lezada no promete iha tribunál katak sei la halo tan hahalok hanesan iha futuru.

Aleinde ne'e, lezada mos kontinua konfirma faktu sira iha akuzasaun no deklarata katak sira di'ak malu ona no arguidu la baku tan ona lezada.

Alegasaun final

Prokurador konsidera arguidu provadu komete faktu sira iha akuzasaun tanba arguidu konfesa integralmente. Maibe prokurador konsidera buat ne'ebé halo kmaan ba arguidu maka arguidu konfesa, di'ak malu ona ho lezada no la repete ninia hahalok ne'e. Nune'e husu ba tribunál atu kondena arguidu ho pena admoestasaun.

Entretantu defeza iha nia alegasaun konkorda ho prokurador nia alegasaun no husu ba tribunál atu kondena arguidu ho pena admoestasaun.

Desizaun

Depoide avalia faktu sira hotu, tribunál prova katak arguidu foti kadeira masa ida no baku dala ida iha lezada nia ulun no lori ai-pedasuk ida hodi dudu lezada nia kotuk-laran. Bazeia ba prova sira ne'e no tetu ba sirkunstansia sira, tribunál konklui prosesu ne'e no kondena arguidu ho pena admoestasaun.

20. Krime ofensa ba integridade física simples ho natureza violéncia doméstika

Nú. Prosesu : 0508/15. DICMR
Kompozisaun Tribunál : Singulár
Juis : Dr. João Ribeiro
Prokurador : Dr. Claudio do Rosario
Defeza : Dr. Germano Ramos
Desizaun : Pena admoestasaun

Iha 24 Feveiru 2020, Tribunál Distritál Dili prezide julgamentu leitura sentensa ba krime ofensa ba integridade física simples ho natureza violéncia doméstika ne'ebé envolve arguidu VA hasoru nia feen, iha Distritu Dili.

Akuzasaun Prokurador

Prokurador akuza katak iha 05 Agostu 2015, iha oras tuku 11:30 dadeer, lezada telefone ba arguidu ne'ebé iha hela serbisu fatin atu husu fila ba uma. Bainhira to'o uma arguidu diskute malu ho lezada no arguidu tuku dala ida iha lezada nia kotuk-laran, no tuku dala ida iha lezada nia kabaas. Aktu sira ne'e rezulta lezada sofre moras iha kotuk laran no kabaas parte loos.

Prokurdór akuza arguidu kontra artigu 145 KP kona-ba ofensa ba integridade fízika simples ho moldura penál to'ó tinan 3 ka multa, konjuga ho artigu 2, 3(a) 35(a) no 36 LKVD.

Produsaun ba prova sira

Iha julgamentu, arguidu konfesa integralmente ba faktu sira iha akuzasaun no deklara katak arguidu komete krime ne'e tanba bainhira fila uma, lezada simu hasoru arguidu ho tolok. Mezmu nune'e, arguidu deklara katak arrepende ninia hahalok, di'ak malu ona ho lezada no promete sei la halo tan hahalok hanesan hasoru lezada iha futuru.

Aleinde ne'e, lezada mós kontinua konfirma faktu sira iha akuzasaun inklui konfirma ho arguidu nia deklarasaun katak sira di'ak malu ona.

Alegasaun finál

Prokuradór konsidera arguidu provadu komete krime ofensa ba integridade fízika simples ho natureza violénsia doméstika hanesan iha akuzasaun hasoru lezada. Maibé tanba arguidu konfesa, arrepende ona ninia hahalok no atu halo prevensaun iha futuru, husu ba tribunál atu kondena arguidu ho pena admoestasaun.

Nune'e mós defeza konkorda ho alegasaun prokuradór nian hodi husu pena admoestasaun tanba arguidu konfesa, arrepende ona ninia hahalok no di'ak malu ona ho lezada.

Desizaun

Depoide tetu faktu sira hotu, tribunál prova katak arguidu tuku dala ida lezada nia kotuk laran no tuku dala ida iha lezada nia kabaas parte loos. Bazeia ba faktu provadu sira ne'e no tetu mós ba sirkunstánsia atenuante sira hanesan arguidu konfesa, arrepende ona ninia hahalok no di'ak malu ona ho lezada, tribunál konklui prosesu ne'e no kondena arguidu ho pena admoestasaun.

21. Krime ofensa ba integridade fízika simples ho natureza violénsia doméstika

Nú. Prosesu	: 0024/19. ALSIC
Kompozisaun Tribunál	: Singulár
Juis	: Dr. João Ribeiro
Prokuradór	: Dr. Nelson de Carvalho
Defeza	: Dr. Manuel Sarmento
Desizaun	: Pena admoestasaun

Iha 25 Fevereiru 2020, Tribunál Distritál Dili prezide leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu MM hasoru nia feen, iha Distritu Aileu.

Akuzasaun prokuradór

Prokuradór akuza katak iha 15 Abril 2019, iha tuku 09:00 dadeer, lezada haruka nia oan sira atu loke fore talin maibé arguidu nia inan ko'alia netik dehan “tanbasa hodi kalan la loke? agora foin haruka labarik sira loke”. Nune'e lezada ho arguidu nia inan hahú diskute malu. Rona diskute malu ne'e, arguidu mós iha uma laran hamutuk ho nia inan ko'alia hasoru lezada. Arguidu buti lezada nia kakorok no tuku dala rua iha lezada nia kanuruk. Aktu sira ne'e rezulta lezada sofre moras iha kakorok no kanuruk.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu, arguidu konfesa parsialmente ba faktu sira katak buti de'it lezada nia kakorok no dudu lezada ba odamatan tanba lezada tenta atu baku nia inan. Arguidu la tuku lezada nia kanuruk. Mezmu nune'e, arguidu deklarara arrepende ninia hahalok, di'ak malu ona ho lezada no promete perante tribunál sei la halo tan hahalok hanesan hasoru lezada.

Nune'e mós lezada kontinua konfirma arguidu nia deklarasaun katak arguidu buti de'it lezada nia kakorok no dudu ba odamatan maibé arguidu la tuku nia kanuruk. Lezada hatutan katak kona-ba tuku iha kanuruk, lezada inventa bainhira hato'o deklarasaun iha Ministériu Públiku. Lezada mós konfirma katak sira di'ak malu ona no to'o agora arguidu la baku tan ona lezada.

Alegasaun finál

Prokuradór konsidera arguidu provadu buti lezada nia kakorok no dudu lezada ba odamatan. Arguidu konfesa, arrepende ona ninia hahalok, maibé atu halo prevensaun iha futuru, husu ba tribunál atu kondena arguidu ho pena admoestasaun.

Nune'e mós defeza konkorda ho prokuradór nia pedidu no husu pena admoestasaun tanba arguidu konfesa, arrepende ona ninia hahalok no di'ak malu ona ho lezada.

Desizaun

Depoide tetu faktu sira hotu, tribunál prova katak arguidu buti lezada nia kakorok no dudu lezada ba iha odamatan. Tribunál la prova arguidu tuku iha lezada nia kanuruk. Bazeia ba faktu provadu no la provadu sira ne'e hotu inklui tetu ba sirkunstánsia atenuante sira hanesan arguidu konfesa faktu sira, arrepende ona ninia hahalok, di'ak malu ona ho lezada, ho nune'e tribunál kondena arguidu ho pena admoestasaun.

22. Krime ofensa ba integridade física simples ho forma violénsia doméstika

Nú. Prosesu : 0397/19. DICMR

Kompzisaun Tribunál : Singulár

Juis : Dr. João Ribeiro
Prokuradór : Dr. Ricardo da Silva
Defeza : Dr. Germano Ramos
Desizaun : Pena admoestasaun

Iha 27 Feveireiru 2020, Tribunál Distrital Dili prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu AFN hasoru nia feen, iha Distritu Dili.

Akuzasaun Prokuradór

Prokuradór akuza katak iha 08 Jullu 2019, maizumenus iha oras tuku 16:30 lokraik, lezada kondús motorizada no tula nia prima DNF ba halo exersísiu (halai) iha área João Paulo II, Tasi-Tolu. Bainhira to'o ne'ebá, lezada hasoru lezada nia kolega mane ida ne'ebé husu ajuda ba lezada atu tula hela nia ba iha Raikotu. Maibé iha tempu hanesan arguidu ne'ebé iha hela mós fatin hanesan, haree hetan lezada tula dadaun ona nia kolega ne'e nune'e arguidu haruka lezada hatun lezada nia kolega no arguidu ho lezada fila kedan ba sira nia uma. Iha uma, arguidu basa dala ida iha lezada nia hasan parte loos no hadau tiha lezada nia telemóvel.

Hafoin ida ne'e, lezada ho motorizada filafali ba São João Paulo II ho intensaun atu ba tula fila lezada nia prima DNF ne'ebé lezada ohin husik hela iha ne'ebá. Bainhira lezada fila ba uma, lezada husu atu arguidu fó fila lezada nia telemóvel maibé arguidu la fó no basa tan dala ida iha lezada nia matan fukun parte loos. Aktu sira ne'e rezulta lezada sofre moras iha hasan parte loos no matan fukun parte loos.

Prokuradór akuza arguidu kontra artigu 145 KP kona-ba ofensa ba integridade fízika simples konjuga ho artigu 2, 3(a) no 35(b) no 36 LKVD.

Produsaun ba prova sira

Iha prosesu julgamentu, arguidu konfesa integralmente ba faktu hotu iha akuzasaun no deklarata katak hafoin akontesimentu ne'e, arguidu ho lezada hela separadu tiha maibé depoisde liu semana ida sira di'ak malu fali no kontinua moris hamutuk. Arguidu mós deklarata katak arrepende ona ninia hahalok no foin primeiravés mai hatan iha tribunál.

Aleinde ne'e, lezada mós kontinua konfirma faktu sira iha akuzasaun no konfirma mós ho arguidu nia deklarasaun katak katak lezada ba hela ketak tiha durante semana ida, maibé depoisde ida ne'e sira di'ak malu fali no to'o agora arguidu la baku tan ona lezada.

Alegasaun final

Prokuradór konsidera arguidu provadu komete faktu sira iha akuzasaun. Maibé mezmú arguidu konfesa, arrepende ninia hahalok no di'ak malu ona ho lezada, husu ba tribunál atu kondena arguidu ho pena multa.

Entretantu defeza husu ba tribunál atu aplika pena admoestasaun tanba konsidera sirkunstánsia atenuante sira hanesan arguidu konfesa integralmente ba faktu sira, arguidu arrepende ninia hahalok no di'ak malu ona to'o agora.

Desizaun

Tribunál prova katak arguidu basa dala ida iha lezada nia hasan parte loos no basa dala ida iha lezada nia matan parte loos. Bazeia ba faktu provadu sira ne'e no tetu mós ba sirkunstánsia atenuante sira hanesan arguidu arguidu konfesa, arrepende ona ninia hahalok, di'ak malu ona ho lezada no foin primeiravés mai hatan iha tribunál, nune'e tribunál konklui prosesu ne'e no kondena arguidu ho pena admoestasaun.

Atu hetan informasaun kle'an liu tan favor kontaktu:

Casimiro dos Santos

Diretór Interino Ezekutivu JSMP

Diresaun e-mail: santos.cas76@gmail.com

info@jsmp.tl

Telefone: 3323883 | 77257466

Website: <http://jsmp.tl/>